

四庫全書

集部

欽定四庫全書

集部

祠部集卷十三至十五

詳校官庶吉士臣朱理

檢討臣何思鈞覆勘

總校官編修臣朱鈐

校對官學錄臣謝登嵩

謄錄監生臣洪特起

欽定四庫全書

祠部集卷十三

宋 強至 撰

劄子

代轉對劄子

伏覩朝堂曉示近降中書劄子節文奉聖旨臣僚已授  
差遣並令依例朝辭許當日實封轉對文字於閣門投  
進者臣身在冗列特其心思有所補欲一進狂瞽之說  
而厥路無由今乃承詔得自獻其愚茲不可常之遇然

而不以二帝三王之道陳于前是不以堯舜文武望吾君也臣竊謂致治之本在用人用而不得其當如弗用徒有所累而無益於治也故其先論用人且廣審德達衆志宜莫如聽言聽之不得其審而是否參用則累於聽故其次論察言夫巧偽興則誠實廢天下之俗將相率而趨於詐故其次論所以矯士風之偽又聳士大夫之節者在遇之以厚儻進責其節備而退待其身薄則賊恩而無勸故其次論所以措老臣之宜今臣之所陳

敢不以堯舜文武之道有望於陛下是故竊不自知輒  
冒不赦之誅著篇于左惟陛下垂聽而擇焉

論用人 臣伏觀陛下以聰明睿智之德臨有重器方  
銳然垂意於大有為之際躬攬萬化乾剛震烈以權以  
斷凡事有所宜於人者朝思而夕行之不持循而固  
守雖前世已行之熟未嘗或憚改天下懽呼鼓舞拭目  
以觀聖人之作而跂踵以待極治之成謂按資計日不  
足近卓異之士而責非常之效或左右一言以為材或

偉辭高論自合於上意則超然置於平進之上而不復  
限常序在聖君求才之心為得矣奈何未聞有奇功顯  
業取稱朝廷之所以寵異而聳動衆人之心使之歆羨  
者不唯不如是又人人有不自滿之色而翻憤其躐已  
且興勸之道未一得而奔競之風已四起矣借如某士  
以計進既越千百人而處之金穀要剝之地矣經費一  
有不給於內民力一有屈竭於外方是時也宜倚辦斯  
人果籌畫有以應猝而財用由其所自出雖日遷之職

人不以為過其以文學政事進者類試之若是惡有不  
服者歟今則不然取其名不責其實始以此進終不以  
此試又冒虛名而受實用者或其中無以異衆人欲人  
人自安其分難矣且不得知於左右則不能自達於朝  
廷計資級累日月則不能底富貴之速以是走公卿之  
門唯恐足跡之或後望廢恥之長而奔競之息抑難矣  
持甚高之論者未必無甚卑之行騁喋喋之辯者未必  
有犖犖之見言之不可必信也如此噫虞舜之智非不

及其臣又命之以九職者皆當時功德易見之人猶咨  
俞曲折以盡羣臣之可否者知獨見不足以取人也矧  
一言以為材耶既奏以言矣而復試以功者知徒說未  
足以明其效也矧一論之偶合耶臣愚以謂取人以言  
則詭辭巧辯者出以希一時之合曾無益於實也進人  
與其失於速也寧緩進真才失之緩其德章而不可揜  
終為國家用若庸才誤速進也徒激不如已之憤而於  
誼無所勸然則若之何其可用人法虞舜斯可也



論察言 臣竊以聖人體不降几席之上而聰明隱於  
旒纒之內凡天下臣民事物之情洞然若家至而目見  
者由廣問以得之也問之者廣則言之來無窮君子小  
人有時而雜吾聽也用其言不善則失之於跬步况其  
遠者乎得失之機在用君子小人之言耳惟君子者其  
言初若厲已而終有以利行故聽之者難也不必效於  
近或有驗於遠以為濶於用也小人則不然其言逢意  
而易入行於遠則泥措於近或通以為切於理也其有

所愛必有所是其有所惡必有所非而是非未嘗牽於  
愛惡之私者君子之言也以愛惡而移是非其情偽卒  
莫可見者小人之言也於戲問之非難受言之惟艱受  
而察之又其艱也昔虞舜所以獨稱大智而後世弗可  
及者由好問而察通言也既好問矣下情其有不通乎  
又察言矣是非其有不白乎故其智塞乎天地之間而  
莫與較其大也恭惟陛下變萬化之變而不自以為神  
燭百事之隱而不自以為聖舍己稽衆畢采羣說由公

卿以及于百執事莫不人人爭竭其慮言路開而治道  
行矣然而惟君子與小人其言闕乎得失方聽納之際  
臣願陛下用虞舜之察而辯之在早使大公至正之論  
行而不為巧辭邪說之所勝則其為智愈大矣

論矯士風之偽 臣伏聞聖王在上莫不欲明德厚俗  
所以教化醇而習俗媿者由先正天下之風其風正顧  
有蹈非其道者乎臣竊觀急賢願治未有如今日之切  
而詐偽成俗亦未有如近世之盛方陛下寤寐咨訪思

得博實樸茂之士進以為風俗之倡有人焉曰仕者有某士處者有某士其為人也性恬而操約行淳而質茂故外物無所累其內公卿以言諸朝而朝廷用之不待班次天下之士知上之所取者以是則有隱為沽激求聞之計而陽為靜退不競之行其心惟恐爵位之不高而其言惟恐山林之不深至於矯情飾貌以譁衆動俗及名成而計得矣而意有所未滿且懼進之不加速也則又有靳閑願退之請以邀乎上其請數者其罷益固

小詐則小得志大詐則大得志後來者務勝於前人愈假不可及之言行以濟諸詐朝幸進而暮失其所守浸淫誕謾天下日入於偽而不知止此風遂肆欲望俗化之厚其可得耶噫巧言令色不容於堯之朝今士偽其行豈聖世之所宜有夫欲矯之使正豈曰無術且衆人曰某賢矣其行淳又不苟乎進必考其實果非矯妄以疑世又有可進之勢而不進是真賢者也然後進之又其退也聽其所自退則真退者出而士之言行進退皆

誠天下之俗其有不歸於正乎

論措老臣之宜 臣伏聞聖王能養臣下之節當其進而使之也既以禮及其退也又示之以不忍輕去之心然後人知自重而不失去就之正惟其去就之不失所以廉恥興而風節完矣古者大夫七十而致仕是老者必自告於其君也若不得謝則必賜之以几杖是臣雖告老而君或不聽其去也老而必以告者知耄將及矣即有萬鍾之享不可得而戀以安吾義也告之而不聽

其去者彼誠老矣而力若可勉猶當強而祿之以終吾仁也近世俗澆薄廉恥不行於衣冠之間或覷然忘其齒髮之衰筋骸之憊貪進而不知止至有其身嘗用於國家矣一日老與疾相會怙怙然求蒞間局以不得請為憂者有自蔽其狀告上以不疾至放之田里猶惓惓然有乞哀不欲去之色者噫仕而至於老且疾可去矣然猶不去以自辱彼固不足惜也但火盡其力而老無以容其身其在仁政抑恐有所累爾今夫四海之廣百

官之富若此等輩豈不容有耶故疾則賜之告以冀其萬一之安老則置之散以養其不復久之歲月免斥歸之名則疾者無所愧獲易得之祿則老者無所憾然後全進退之體以示夫不可輕之去就顧老而疾者既愛之若是則少者勉力而無卹於其後矣風節其有不完者哉昔在三代之治唯周家所以號忠厚者獨養老之為備成周之養老果復行於今日臣不勝大願

右謹具如前是四篇者痛竭臣愚區區之忠曾不足以



仰輔盛德之萬一千冒宸嚴臣無任激切屏營之至

代唐公乞錄用魏鄭公裔孫劄子

臣讀唐史見魏元成之輔太宗能盡忠切諫卒致貞觀之治所以後代欲治之主知納諫為先是其功不止一時而實及百世此其裔孫乃夷民伍又本家見執前來州縣判憑得免差役今乃一刺義勇一充衙前真可憫悼欲乞朝廷特與家長道嚴一官仍免本戶差役庶使為臣者聞異代忠賢之後猶蒙獎錄則今日能忠於朝

廷者誠有所勸也兼臣據魏道嚴賚到遠祖處哲洽官告二道處哲乃元成之孫洽乃重孫今道嚴等鄉里在臣管下既再有敘陳合具敷奏取進止

代孫待制乞郡劄子

臣學術淺陋始備東宮官屬陛下睿德自廣無有所補洎六飛在御首蒙拔擢置之近侍恩榮兼極獨母老懷鄉日夜思去臣方受命西陸不敢即以私計妨公事今已事歸闕是敢輒干宸聽臣欲乞某處一郡遂老母思

卿之心又得以二千石之祿侍奉甘旨乾坤恩施莫此  
為大臣非不知荷陛下生成之德有踰父母遠闕庭咫尺  
之地則戀清光蓋臣事陛下之日長而事親之日短  
伏望陛下憫烏鳥區區之情特賜俞允

代乞徐州劄子

臣近三上章乞就移徐州伏蒙聖慈遣使降詔不允所  
乞豈唯恩禮之重懼弗克稱伏讀睿訓尤增悸慄始者  
地震北道民流去四方朝廷以四路綏御之柄全屬臣

臣於此時勢有可辭而不以為辭今災震既息流徙既復民和歲穰幾至無事而又去三路之煩而就一道之簡可以無辭矣而辭之由外而觀臣則有若所為倒錯而圖安已甚在臣自省則以為前日之不辭者力猶可勉今日之必辭者疲不任劇若猶處此則上不能勤宣陛下利澤下不能深究兵民疾苦中不能完養老臣久衰之氣是朝廷重易臣一州而俾臣負三不能之患恐非所以厚仁恩念舊物之本意也臣識具材術無足過

人如天性所得之多私心自信之篤者唯至誠樸忠爾  
今臣以樸愚之誠叩陛下倘陛下垂聽而哀憐之使養  
疾僻州避遠要劇物性得所自然安和天地之恩有如  
今日之再造犬馬之力敢忘異時之火施然臣尚有餘  
懇謹附陳其口奏云

代乞邢相劄子

臣近以連年被疾三曾奏乞就移邢相一郡令月二十  
二日某官齋到勅告各一道伏蒙聖慈加恩再任者復

司筦鑰仍換節旄恩與願違敢畢愚懇伏念臣久勞多病日瘁一日而猶遲徊強勉不敢亟去甫及二歲然後決請於朝廷者重辭陛下北顧之託冀憫其日月之久而筋力不支有可去之理今乃蒙改恩遣使再委重寄丁寧賜諭不許訴免上心圖舊雖至優篤在臣愚分義實難處且前臣之所以辭是力不勝劇也若今日之所以受是有邀而貪得也名為辭劇而實在邀得此非事君之道也陛下即哀臣既憊不忍遂廢猶當置之閒郡

俾資醫藥心休體佚自有生意犬馬未斃尚効餘力矧  
北門衝會非養疴之地儻再勞歲月或殘驅不能保是  
寵之適足以害之也恐非所以愛老臣之意伏望陛下  
特回鑒照曲全衰朽就移邪相一郡使便調養形骸雖  
茆苟完復之有時溝塗未填免哀憐之已晚罄輸血懇  
決俟矜從

代謝宣賜劄子

顯飭使指肅將恩賚跼然拜覲感懼交集伏以仁廟在

位四十二載神功聖烈貫蔽天地善美衆鉅莫可勝紀  
此書之成雖曰浩博若論次本末則官吏協慮照定是  
否則仰憑睿鑒臣於其間夫復何力而中金上幣文韞  
良駟謂疇薄效殆虛寵數此蓋伏遇皇帝陛下紹休鴻  
業推廣孝治維時文祖垂光典冊終篇奏御親紆省覽  
凡一時秉筆與夫典領之臣匪頌增秩以至降詔褒諭  
莫不務極優渥以稱聖孫所以奉揚祖德之意罔功被  
獎以榮為愧乾坤恩施何以論報



謝刷蕩劄子

人君之言格諸天地吏民同聽孰不感悅恭惟尊號皇帝陛下即位以來孜孜政化常欲置刑不用之地而下民多辟自抵邦法雖深居蠖濩而猶軫萬方有纍繫之幽每歲歆暑降詔矜恤堯仁禹泣何以尚之臣職在長民不能諭陛下欽慎之意俟丁寧而後知則臣之過宜無以宥謹當奉行德音夙夜自勉庶幾獄無留繫吏無濫罰以副聖君慎刑之心此臣區區之願也

祠部集卷十三

欽定四庫全書

祠部集卷十四

宋 强至 撰

表

賀乾元節表

臣某言伏以維夏肇和厥月幾望訢是穀旦實生聖人  
罄率土以騰驪比南山而稱壽臣某誠歡誠抃頓首稽  
首恭惟皇帝陛下神靈天縱文思日躋毆民仁壽之中  
登治唐虞之表重熙復旦載誕膺辰九五君臨肇洪基

於不拔億萬天算綿景祚於無垠臣無任瞻天樂聖聳  
躍歡呼之至

代泗州盧郎中謝到任表

戚休千里宜求外牧之良忝冒一麾茲實下臣之愧揆  
恩至渥引分何堪臣某誠惶誠感頓首稽首竊念臣學  
弗名家器難適用尸榮僅四紀出守者數邦罄竭鄙才  
訖微善狀而况沿汴置郡臨淮據衝舟車往來之繁曾  
無虛日金穀運輸之入率由此途俗薄好爭地卑多潦

雖賢守長猶艱智力之周若臣愚蒙易稱要繁之委此  
蓋伏遇尊號皇帝陛下乾坤其量何細不包歲月之勞  
雖微亦采使之治劇敢不究心宣布詔條之寬變移風  
俗之厚庶幾一得云補萬分

賀明堂禮畢表

精饗告成湛恩隨布庶邦聞慶億口騰歡中賀竊以合  
宮之祠歷代不講肇自有唐之際迄于我宋之初議者  
欲興寢而弗服邈哉墜典舉在熙辰恭惟皇帝陛下紹

三聖之休御九圍之廣洪造天冒盛猷日躋行教化之  
所未行紹禮樂之所未紹祭典咸秩治具畢張謂夫布  
王政者在明堂爰修曠制示民孝者由宗祀乃奉嚴禋  
逮乎訖大禮於總章坐中天之峽闕追肆赦於往中許  
自新於吾民靈心顧歆並貺多福渙渥汪濊一清賤牢  
人神共和遐邇均幸臣迹縻守土籍遠侍祠第聽德音  
之宣阻觀帝饗之盛

代泗州盧郎中明堂大禮陳乞次子恩澤表

伏遇國家詔舊禮之常修合宮之饗稀闕之典事遽復  
於我朝疏遠之臣澤庶霑於厥嗣輒披愚款仰瀆聰聞  
臣有次男某生會右文火知從學以其本專儒術未能  
自致於榮名欲乞特受文資所覲不違於素願兼臣歷  
任以來並無贓私過犯伏望尊號皇帝陛下廓如天之  
造推延世之私曲軫聖慈俯從臣請如是則人神胥慶  
喜曠制之舉行父子知榮荷茂恩之均及

代謝進職表

恩數推優禁聯增峻名浮已甚寵至惟驚中謝伏以本  
朝啟宸構以藏書憲義圖而署目因名學士之職以擢  
從臣之才所宜職際聖徵術鉤經奧俾塵清選迺稱徽  
章竊念臣一介單寒片文猥瑣蚤緣曲藝輒冒異科幸  
既出於逢辰仕不由於累日參憲臺之風議無所見明  
預財府之權謀曾何經畫如守愚而欲分敢躡等以越  
思亟叨內閣之華密奉前旒之邃固未能發揮儒效藻  
潤帝猷會邊閫之須人假州麾而出守樸忠自信已誤



簡于睿心闇懦以機弗過防於讒口果飛疑似之語仰  
瀆神聖之聰蓋孤根之易搖致謗誕之肆起尚賴睿慈  
垂惻皇鑒照微止頌尺一之書移總東南之漕荷知臣  
之至哲堅報國之初心雖金穀數藜江淮間歉力經大  
計未始寧居旁均百郡之輸仰給中都之費偶充歲課  
僅免官瘵遽收采以寸勞加顯嚴於近署況臣間闕官  
路久去於清光鞅掌利權怙迷於舊學拜嘉非稱竊幸  
居多此益伏遇尊號皇帝陛下天造曲成帝暉下燭以

臣夙因會遇嘗備使令簪履之舊弗捐靡遺於煩使毫髮之功亦獎示勸於勞臣特假寵光濫延疏外敢不激昂志尚究悉事為誓策疲薦庶酬覆露

代馬察院謝表

昨叨寵數因揣器能弗稱徽章乃呈讓奏靡回成命豈敢固辭勉強拜嘉兢慙失措中謝伏以憲府之選官材實艱論朝廷是非舉臣寮過失秩輕責重受易才難專一意以謹司尚虞收職假他官而兼授豈曰慎名竊念

臣發跡寒鄉策名昭世最為平進絕少他竒畿縣補官  
未施於寸效庭闈遭禍偶及於終喪宦緒間闕生意衰  
落會曲恩之延被佐通漕之輸將而且金穀數藜江淮  
歲歉僅充舊課遽錄微勞弗循官次之常俾預臺中之  
列布衣奉詔有媿於祖風赤芾貽譏深防於物議臣所  
以愿披悃愬避龍光渙渥不休尸榮為甚此蓋伏遇  
尊號皇帝陛下乾坤覆燾日月照臨采臣銖兩之勤欲  
有功知勸加臣糾察之目欲雖遠竭忠敢不力樹壯猷

思稱上意經營大計之暇圖講當今之宜國家之事可言雖危不避君父之恩欲報之死無他

代泗州陳郎中待罪表

臣任叨守土職在長人不能宣諭教條發揚孝治曾無善政副共理唯良之稱是致下民抵五刑莫大之憲竊以古之良守名布冊書因昆弟之忿爭尚閉閣而至咎而況子之毆母事越常聞傷教悖倫莫茲為甚未能投紱引去以謝匪才是敢拜章自陳恭俟出典

代待罪表

長人亡狀致條教之不行匹婦何知抵刑科之莫大中  
謝臣聞古之刺史名在冊書悼昆弟之訟田謝吏民而  
閉閣矧茲同產輒爾相殘有傷孝治之風其實守臣之  
罪左符所繫未能投紱而遂歸甲令有文是敢拜章而  
自劾

代賀冬表

臣某言伏以雲物望書因豫知於祥禋天陽來復方漸

發於孳萌中賀恭惟皇帝陛下握斗披元對時凝命通  
臨慶序翕受鴻禧鳴玉造廷儀亞三朝之盛測圭視日  
景同萬壽之長臣適領守符方遙陞城阻預捧觴之列  
第虔拱極之誠

代王禹玉內翰謝兼侍讀學士表

右臣伏蒙兼侍讀學士特賜衣一襲金腰帶一條金鍍  
銀鞍轡馬一匹者玉畧代言之地老於文學之所居金  
華進讀之聯通厥古今而後與兩塗踐一已為儒者之

枉榮孤宦獲兼茲實聖時之盛遇而又華韜良駟以安  
其體美衣博帶以文其容難俯偃以循辭輒服乘而拜  
貺竊以珮服與德而相對始免於譏車馬稽古之所蒙  
可誇乎寵而臣者學未到聖賢之奧處論或剽父師之  
緒餘蚤緣科選之誤優寢辱禁嚴之首據侍牲幣告豐  
之聖饗何有駿奔之勤敷雷霆作渙之王言復無潤色  
之狀詎意上恩之博遽加中講之崇御府頒衣天閑授  
駿申錫副帶環之麗餽金增韜葉之光載省無堪深虞

不稱洪私甚昵屈名器之大公危抱如丹竭涓塵之火  
效

代包孝肅公謝樞密副使表

臣某言伏以疏息至渥懼大取於時譏瀝懇維勤弗火  
移於詔意勢不遑讓寵其可驚免服華章難安悸魄中  
謝伏念臣仕以孤進術無他長獨信樸忠之可持不知  
徼幸之為利蚤際聖世頃塵諫員遇事輒論以身當怨  
殿邊隅之巨屏易暢遠圖專江浙之孤城訖無善狀旋



膺近名假尹中畿近則賴天子之聰明遠則學古人之  
鉤鉅雖奸豪之稍戢於暗拙以何功誤聽朝僉擢持風  
憲紀綱之地未能為國體而一言金穀之司猥以付邦  
須之大柄事端萃止心計茫然方虞曠瘵俄正使號列  
讓封而懇避曾未踰旬綴陪幄之後塵遽焉易地責  
愈重揆才弗勝然有時乎為貧尚且辭富以前日不受  
是抑恐令非而況主計惟艱運籌不易識曉治亂方能  
合四輔之謀略具武文始可究五兵之本自視近器曷

參繁機歷開不可之端庶寢已行之命愚衷第確天旨  
靡回俾附樞躔之末光許聞廟筭之餘論此蓋伏遇尊  
號皇帝陛下大明如日全度惟天乃眷孤臣不遺造物  
舍盈庭之衆哲特取菲能忘假器之煩言專融睿斷敢  
不夙夜重寄渴飢一心切平世防微之圖凜聖經慎戰  
之戒誓畢餘齒仰酬上仁

謝生餼表

載誕丁辰方集已孤之感匪頒列品俾供式宴之私出

拜王人之命於庭入聞宗黨之慶於室恩榮相照喜幸  
交深中謝伏念臣偶以樸忠驟當睿選智小不足以識  
大體才近不足以經遠猷自坐論於中階殆空餐於厚  
祿第懼煩言之起敢希飫賜之臨豈謂尊號皇帝陛下  
分篤君臣禮優丞弼記其生日將以歡息均肥旨之醪  
牽加精甘之麴蘖仰對需雲之施愈慙鼎食之浮飽上  
德以何厭醉皇慈而難酢唯勤夙夜稱今日之所蒙稍  
立事功庶爾生之無忝

代沂國公主明堂禮畢賀皇帝表

伏以聖人唯能於饗帝並侑五精之神嚴父莫大於配  
天兼風億姓之孝合宮訖事罄宇均歡中賀伏惟皇帝  
陛下紹淳耀之烈光享重熙之盛福念物蕃俗阜茲二  
氣之所以降休謂德大報微非一純莫可將意以至徹  
鼓吹以盡齋容之恪潔圭幣以謹靈心之承臣民忻睹  
盛儀隨霑渥澤免妾夙蒙睿訓亟被皇慈側聞玉輅之  
旋誠切素襟之忭

代婕妤俞氏才人朱氏賀表

伏以德產至大惟至虔可以上交孝思無窮非昭配不能自達於穆宗祀維時總章人祇普和恩禮並洽中賀伏惟皇帝陛下暢配天之偉績秉順帝之清衷乘冷露之風懷儵旻穹而謁款玉帛薦潔粲盛報豐靈心顧歆協氣充塞妾等陶生盛世玷號後宮竊觀熙事之成同慶洪私之布

代曾魯公辭加恩表

合宮已事罄宇均禱首眷近司併推蕃數罔功被獎匪  
服懷慙在義未安獲辭乃止中謝伏念臣蚤緣家學繼  
竊朝榮策足冗塗致身華貫始校文於書殿尋勸講於  
經帷進司西掖之言起眈北門之草以至攝治大衆參  
開萬幾往冠斗宮曷坐籌於勝算旋登台路第隨講於  
成規迄是踰年居然備位伏遇國家風示民孝靈承天  
儀尊推先君昭配上帝並升圭幣之潔益凜廟祧之嚴  
裸將于宮樂徹乃俎熙成禋禮霈發德音慶浹人祇寵

先丞弼既疏美號并行真封而汎克濟上儀實非一力  
有主計之臣以助乎經費有陪祀之衆以供乎駿奔禮  
率按於舊常事動咨於睿訓夫惟彼相於此何功翻兼  
冒於王明懼弗容於物議尚繫確讓可弭煩言伏望尊  
號皇帝陛下全度天涵大明日照洞微衷之必至追成  
命於已行特寢誤恩俾諧愚分

第二表

贊書錫寵錄相祀之微勤讓牘敬陳具假名之大略靡

回宸旨促拜恩章雖前蹈於嚴誅難少移於確請洵披  
危悃決俟俞音中謝竊以輔相乃表儀之司匪義則動  
將安仰慶賞無巨細之異當分則處之勿疑而況捍難  
者是謂功臣固非虛號進律者抑存王制莫重真封豈  
有陪原廟之天臨扈屬車之雷動陟降九筵之次雍容  
萬玉之先密奉清光縱觀盛禮顧粲盛之豐薦益抃時  
和省俎豆之前聞頌還舊學茲為厚幸復敢叨恩矧聖  
饗之先期有王言誕告具咨列辟毋上鴻名而臣則地



在具瞻誼當一德侍嚴祠而何力儻爾尸榮思明詔以  
何顏甚於得責伏望尊號皇帝陛下如天縱欲與物終  
仁念志莫奪者匹夫且賞不妄者人主亟追繆寵以勸  
有功

代魯公謝生日禮物表

門孤設左親生適記於初辰邦詔發中君賜遽頒於多  
物拜嘉有腆萃感無涯中謝伏念臣南服孤生端朝平  
進偶緣樸學寔厯華塗器不兩周安適方圓之用才無

一可矧兼文武之資自樞幄之剋謀即宰庭而亞政未  
竭股肱之效已驚齒髮之衰直畏人言曷禪王體惟載  
生之始旦第自謹於私門敢謂睿明亦煩省記救身枝  
而將命俾手舞以馭休鏤器織文殫巧工之精制華韞  
良駟分寶技之餘輝榮動比閭先生豐節仰麗章之特  
異知恩紀之由來此蓋伏遇尊號皇帝陛下與物終仁  
為邦隆體乃眷四隣之輔謂同一德之親爰舉舊常併  
推蕃數皇慈甚渥惠固絕於能名愚抱如丹誼惟知於

欲報

代賀皇帝登極表

大明相繼景命維新凡在懷生孰不稱慶中賀臣聞帝  
出乎震品物所以咸蘇龍飛在天聖人所以有作恭惟  
皇帝陛下至仁生稟盛德日躋孝悌恭溫發於主器之  
際聰明睿哲廣自承祧之初人祇交歡宗社永賴雲行  
雨施矧霽霈於德音乾端坤倪率薰蒸於喜氣臣適提  
外計久去通聯第深欣戴之誠阻預歡呼之列

代謝加恩轉官表

官榮不次列讓讀以啟還宸旨莫回降批章而促拜寵  
靈滋極涯分深踰承命若驚撫躬莫措中謝伏念臣日  
蒙樂育天與樸忠才不足以濟時誼唯知於許國因緣  
資序寔歷禁嚴孤立公朝固絕心於朋勢久登宰路常  
持慮於蒲盈建功無塵露之微負責有邱山之重遺昌  
期之相繼膺景命以惟新霈發德音並均澤浸特舉便  
蕃之數示優變理之司遽進崇階仍躋榮於鳳閣驟加

庸品將取刺於鵜梁竊揆誤恩愈知厚幸此蓋伏遇皇  
帝陛下至仁丕冒大度兼容曲眷柄臣務全邦體苟筋  
骸之可強誓効微勤在肌髓以寧忘仰酬洪造

壽聖節賀表

臣某言伏以陽春之首四時既謹書王之始月魄之成  
三日聿臨誕聖之期整海寓以騰歡擬岡陵而薦壽中  
賀恭惟皇帝陛下心游道秘躬攬乾綱宴然享函夏之  
歸坐以須大昕之旦雷霆䟽令常必信於四方天地生

成曾靡遺於一物躋時極治與古同符會歲籥之更端  
紀電樞之啟瑞大開路寢普見羣臣萬笏稱觴前祝無  
疆之奠八音奏雅間歌既醉之篇喜動明廷事光甲觀  
臣比司留鑰久去從聯未望清光敢嘆周南之滯阻陪  
盛禮第勤嵩極之呼

代趙都運壽聖節進奉功德疏表

歲聿發春月茲成魄當五始書王之後迺千齡誕聖之  
初統電流虹沓開於瑞應普天率土均沸於歡聲臣是

敢叩金地之莊嚴面玉毫之竒妙恭延淨侶積演秘文  
覬不盡之勝因資無疆之睿算第切後天之祝曷勝向  
日之誠

代元給事壽聖節進功德疏表

右臣伏以王春謹始適臨月魄之成聖運發祥嘗紀電  
樞之繞蒼精出震炎歷承乾會載風之初辰洽均歡於  
率土臣是敢躬趨金地面對玉毫命淨侶以薰修誦秘  
文而演暢所覬離明照耀與世界以無邊睿冀延長等

河沙而莫數第極後天之祝曷勝向日之誠

代韓魏公賀淮陽郡王進封潁王表

臣某言伏覩邸報皇子淮陽郡王進封潁王者真封易  
地徽冊告庭適增王爵之光載發宸闈之慶薦紳聳聽  
罄宇均歡臣某中賀恭惟皇帝陛下德溥臨萬機獨  
運性堯仁而睦族躬禹度以儉家乃眷天支曰咨國典  
以主器莫尊乎長子而擇日以命夫有司寵換舊蕃進  
疏新渥孝恭天至克謹問安之朝文敏日躋靡煩在傳



之日側聞盛禮大愜羣情臣跡限居留心馳慶列無任  
瞻天樂聖聳躍歡呼之至

代王君貺尚書北京謝上表

臣某言環封千里開府萬兵坐制此方據非其地班條  
云始負愧于中中謝載惟全魏之區遐控強敵之境洪  
河襟帶於其左朔野咽喉之所衝自罷郡以置都常擇  
人而作屏地望滋重朝僉愈艱曾紆兩府之印章方付  
北門之管鑰授之近侍誠曰曲息伏念臣少也短能初

無遠業先朝親試之次榜甫冠首叨於甲科臺省回翔  
藩維偃息犬馬之年尚壯鶴鴻之序徧揚蒼鬢嚴塗覲  
顏空食鼎領中山之一道兼提支郡之十城尤幸非才  
適丁無事日常安枕歲聿更書未瞻天日之清光敢圖  
省錄又乏涓塵之素效何所甄陞就畀別京弗沿曩制  
仍加冢宰之秩以示邦人之榮此益伏遇皇帝陛下神  
造曲成乾綱獨運懋法宮之新治念仁廟之舊臣特躡  
彛章俾尸甸服敢不刻求民瘼蒐講武經謹視河防之

虞豫嚴邊鄙之備報償恩施猶知今日之能為揭立功  
名豈獨少年之所慕

代謝傅宣撫問表

貂璫中使因將命於別京管鑰守臣辱記名於丹宸俯  
宣溫諭增感危悚中謝伏念臣僅有薄材豈無竒節樸  
忠自信竊蹈古人之為孤直誰容特膺先帝之遇游揚  
中外奚補毫分自聖統之紹臨即帥符之遐部靡須受  
代旋易居留固未能舞抃廣墀一瞻天日之表論思近

署火場涓埃之愚矧全魏之奧區實朔方之會府控制  
邊瑣繕完河防總一道之戎鈴隸萬屯之兵籍前有元  
台之舊老已建成規上繫真主之睿謨第行寬詔曾微  
善狀可格淵聰祗自顧循敢圖省錄適邁星輅之降遽  
聞天語之傳出如絲綸仰撫存之甚渥煖於布帛愈蒙  
被以為榮特越常彛誠知厚幸此蓋伏遇皇帝陛下至  
仁丕冒大度兼容念法從之典藩屢更全節乘皇華之  
至部親導玉音下堂拜嘉守土增耀敢不深為思假益

勵忠勤誓畢微生覲酬洪造

代王尚書謝傳宣撫問表

使臨所部傳溫語之丁寧跡遠於朝荷清衷之省錄才  
微自恨恩重難勝中謝伏念臣受性至疏逢時獨早勵  
孤忠而自進堅一節而靡踰用不兼人曷周臺省之務  
拙於從政漫歷藩維之行自龍德之天飛即虎符而州  
守決需滿歲歸覲清光就移全魏之封漸近長安之日  
神都南望未一拜於帝暉星傳北徂遽再垂於天語噢

咻斯至蒙被為榮念久冒於華塗復累更於劇鎮第勤  
夙夜曾乏猷為止虞物論之非固裨毫髮敢謂主知之  
誤曲記姓名每常遺於皇華即稟宣於睿誨此蓋伏遇  
皇帝陛下至仁天覆大度海涵以法從之近聯實先朝  
之舊物念數經於事任弗忍去遺恩特示於恩勤游加  
存撫誓圖薄效仰答洪私

代謝添公使錢一千貫文表

公須匱乏輒請益以上聞天旨矜從遽增多而下濟仰

蒙曲賜內激危悚中謝維全魏之要都當朔陸之孔道  
軍校之所犒設使人之所勞迎向除兩府之舊臣有緡  
謂之隨使苟待四方之過客在禮不致闕供臣比忝於  
居留事類裁於往例去者大半不承權輿摺遺利以相  
兼恐傷大體告常貲之不及妄叩淵衷伏遇皇帝陛下  
至德包涵大明臨照飾厨傳以自喜知臣不為損府庫  
之有餘如臣所請乾坤施大塵路報微敢不益勵乃心  
自矢清冰之節庶幾勉供厥職上酬洪覆之仁

祠部集卷十四



欽定四庫全書

祠部集卷十五

宋 強至 撰

表

代賀南郊表

聖人能饗即陽位以齋明上帝居歆擁神休而孚佑照  
臨所暨鼓舞維均中賀恭惟皇帝陛下紹淳耀之烈光  
享重熙之盛福謂俗康物阜茲二氣所以降休德大報  
微唯一統可以將懋乃乘長日之至適奉圖丘之禋四

海之助各來九州之力畢獻高禋上達昭格靈心之承  
協氣旁流並緣精意之感祖考參侑人神普和臣等顯  
相待祠阻觀大報之盛節歡呼聞禮第誦思文之曩篇

代賀南郊禮畢表

圓丘肇祀率土均休熙事適成湛恩隨霈中賀竊原經  
禮之載莫重神明之交三年親祠盛王所以報本列聖  
參侑孝子所以奉先於皇我朝尤縉往典恭惟皇帝陛下  
下聖躋維日德肖于天有懷前人初見上帝卜南至之

長晷罄中虛之一心既歎殊庭載假清廟遂登蒼璧之  
幣祇奠紫觚之營百靈居歆六樂備奏乃薦鬯之夕神  
光陸離升禋于陽霄寓澄廓天旋法駕星拱端闈鼓舞  
兆民普均雷雨之施壽康丕后並浹人祇之歡臣適聽  
休成倍深竊抃忝司留鑰異興歎於周南阻從屬車第  
馳誠於魏北

代元厚之給事賀南郊禮畢表

躬行聖饗遙觀熙事之成嘉共神休隨肆湛恩之霈羣

生鼓舞諸福紛綸中賀洪惟盛朝參用往典報德產之本所以三年一郊盡孝心之思所以四聖同侑恭惟皇帝陛下紹烈精之淳耀承累洽之休期聿懷前人初見上帝卜日南之長畧祠地上之圜丘百靈居歆六樂備奏乃薦鬯之夕昭格神光之臨升禋于陽歛蒙天表之應旋鳴清蹕還御端闈協氣交流普均雷雨之施歡心各得並浹人祇之和臣久去從聯北塵使指阻肅雍而相祀第抃蹈以馳誠

代沈兵部賀南郊禮畢表

竭精意於圓丘熙成祀事沃歡心於率土霑發德音凡  
在周行維均竊抃中賀國家順稽古道參用禮經以天  
地大神有廣生之惠祖宗故事存並侑之文乘三年之  
親祠追四聖以嚴配恭惟皇帝陛下濟躬乾健至德離  
明自臨皇氣之尊肇奉紫觚之饗謁泰壇而徧乎道祖  
假清廟以極乎孝思力畢獻於九州助各來於四海陶  
甄有踐幣玉普登神明相交禮樂並作高禋上達通盼

蠻於靈心協氣旁流格紛綸之瑞應於昭景既以右丕  
圖乃御端闈之崇邁孚渙號嘉與罄宇之內共沐龐休  
臣跡繫朔陸心馳魏闕陪祠莫及拜慶徒深

代賀皇太后受冊表

寶文溫厚奉國典之休稱聖孝尊親極母儀之大奉邁  
光盛禮增抃周行中賀恭惟皇太后殿下夙懋柔儀誕  
敷陰教含坤元之德久內助於先皇育天下之君旋尊  
居於長樂比厥政幾之聽屢形慈訓之勤復辟踰年尚

淹於顯冊有司擇日爰上於隆名臣適領漕符欽聞國  
慶阻就歡呼之列第深鼓舞之情

又

恩篤內朝禮崇顯冊四海臣妾一辭歡呼中賀恭惟皇  
太后殿下坤德靜柔母儀光大進賢以輔先帝有內助  
之勤斷愛以戒後君無外施之失動懷明識嗣邕徽音  
含飴弄孫早優游於長樂臨軒遣使方享受於隆名臣  
比頌左符側聞盛典阻從慶列第激歡誠

又

寶字肅將飭輔臣而虔使隆名恭上極聖帝之尊親慶  
浹天區事光坤極中賀恭惟皇太后殿下懋靜專之懿  
德推涵育之慈懷順承上天輔佐先帝有相成之道無  
私謁之心逮聖嗣之繼臨預政幾之同聽大公天下未  
嘗恩澤於外家密尊宸衷多用祖宗之政事旋還明辟  
益廣歲音長樂優游自享九州之養內朝定省乃惟四  
海之君欲報厚恩適崇顯冊嚴母儀之大奉盡臣屬以



均歡臣久去陞廉比司宮鑰側聞盛典竊忭愚襟

又

欽奉內朝上進極尊之號歡呼聲宇下均欲報之心中  
賀恭惟皇太后殿下坤德靜專母儀光大進賢以輔先  
帝有內助之勤斷愛以勗嗣君無外施之失自懇還於  
明辟益增廣於徽音含飴弄孫遂優游於長樂臨軒遣  
使旋享受於隆名臣適領漕符方遙廷署莫陪慶列第  
激歡誠

代賀皇帝為皇太后受冊表

思齊大任方受尊名之禮稽古帝舜益光絕德之風凡  
在照臨率均并蹈中賀恭惟皇帝陛下聖躋維日德音  
於天念撫毓於清宮荷愛慈於父母極九州之味以為  
養未充孝心上萬年之壽以為歡自篤恩性遣輔臣而  
申飭奉顯冊以上聞寶刻粲然光有司之備物宸衷祇  
若答莫厚之深仁臣久去近班側聞盛典阻歡呼於嵩  
極猶繫滯於周南

又

上宗名於長樂仰慰慈顏舉盛典於熙朝益光孝治照  
臨所及歡蹈其均中賀恭惟皇帝陛下獨運乾綱若稽  
古道自臨正宁之凝命克謹內朝之問安荷文母之仁  
深撫清躬而愛篤夙厚恩性比同政幾復辟踰年遂高  
懷而還處有司擇日奉顯冊以上聞臣久去從聯方恪  
司於留鑰阻陪慶列第延望於明廷

又

尊名恭上慰長樂之慈顏盛禮敷聞廣中宸之孝治照  
臨所及鼓舞維均中賀恭惟皇帝陛下駿命紹休清衷  
覃粹懋聖人之至德仰事內朝大文母之徽音寅加顯  
冊飭輔臣而虔使奉寶字以尊親能報厚恩豈止三牲  
之養載光大號可刑四海之風臣適處外臺正遙丹祀  
激歡誠而尤劇就慶列以無從

代賀皇帝為中宮受冊表

琬琰敷言適恭行於盛典宮闈動色益增耀於徽名凡

在有生維均大慶中賀恭惟皇帝陛下寶有重器勤懷  
永圖踐宸極以稱尊重坤儀之作配念邦家之所御先  
在儀刑猶日月之相須始全臨照緊進賢而輔佐廣稽  
古之聰明以正位於長秋未膺顯冊因熙成於大禮爰  
舉上儀臣職繫朔隨身選丹祀徒仰母臨之慶莫從龕  
拊之聯

又

有司備物謹擇日以選儀乃聖臨軒重覩天之作配文

敷琬琰喜動宮闈中賀恭惟皇帝陛下稽古稱尊撫辰  
凝命不有至明之極亦資內助之賢厚德承乾貴天王  
之同體長秋正位懋太妣之徽音爰加冊禮之崇以稱  
坤儀之大輔臣將命持使節以奉行率土傾心仰母臨  
而歡忭臣任縻朔野跡遠明廷就慶列以無階馳愚衷  
而第切

代賀皇帝為中宮受冊表

儼宸極之尊嚴屢周華歲膺寶文之溫厚增耀長秋凡

在懷生率同大慶中賀臣聞闕雖所以基王化坤順所  
以承乾元岐陽之宜百男驗進賢之效媯汭之墳二女  
輔稽古之明以迄盛朝亦資內助恭惟皇帝陛下清衷  
昭曠至治登閔大旦地以稱尊重覩天之作配以禱衣  
之奉宗廟裸獻時勤而赤綬之正宮闈柔恭日茂尚淹  
盛典未稱徽名申飭柄臣肅將冊禮臨軒以遣使節示  
極褒崇率土之仰母臨維均拊蹈臣比司宮鑰阻侍殿  
帷第激歡誠莫從慶列臣無任瞻天樂聖聳躍歡呼之

至

代王尚書謝加食邑實封表

三年親郊適成熙事一日慶澤爰及從臣疏新命於訓  
辭增舊封之食賦罔功被寵匪報懷慙中謝伏念臣稟  
性樸忠與世迂濶歷華塗而始徧愧薄效之未收一離  
鳴玉之朝數換剖符之地宣上方之恩澤亦既累年撫  
北道之兵民汜茲半稔伏念國家嚴順帝之大奉講就  
陽之聲裡四海各勤其來九州畢獻其力而臣適專留



鑰之掌絕望屬車之馳奉引諸塗空預甘泉之籍駿奔  
以職莫陪吉土之祠第率守臣之常坐修方物之貢甫  
訖聖饗頻沾睿恩既廣爰田復加其戶容孤臣之竊幸  
由洪覆之推仁此蓋伏遇皇帝陛下靈承天心均施神  
貺雖清衷寅畏自抑於鴻名而慈渥涵濡亦周於外輔  
敢不勤宣條教益勵忠規免貽素食之羞思稱鴻恩之  
渥

代元給事謝加勳并食邑表

親郊已事灑澤均休賜詔十行轉勲一級賦益爰田之  
數寵深維谷之憂中謝伏念臣起自諸生最為孤仕祇  
游揚於三紀奚云補於萬分貳大農旋陞近侍引南  
州之紱何有治功籠北道之財復無利術會盛旦之展  
采奉圓丘之輦裡第羨諸侯之駿奔敢嗟太史之留滯  
固不能聽屬車之雷動危從諸塗觀吉土之天臨肅雍  
在位適成熙事例沐湛恩併蒙異數之加彌積罔功之  
愧此蓋伏過皇帝陛下務均神既祇順天心雖於穆猗

那已形容於美頌而克自抑畏弗享受於隆名尚霑洪  
私俯延庶尹敢不益圖忠藎匪懈論恩誓畢微生庶酬  
上德

代賀潁王納妃表

宜家淑德作配元良極典冊之盛儀誠邦家之大慶中  
賀臣聞人倫茲始嘉禮所以重乎婚宗事其承親迎所  
以聞於誠恭惟皇帝陛下建大清之極治紹淳耀之烈  
光畢張朝經爰及家事乃眷天支之愛矧君王爵之尊

孝友生知溫文日就雖曰少成之善當資內助之賢歷  
選華門進嬪朱邸適得公台之後備該圖史之闡禮法  
自嫻言容兼懋長子主器既度越於戚藩遣使臨軒亦  
寵優於嘉耦將傳萬世之嗣茂對三星之期動嘉氣於  
深宮沸歡聲於罄宇適司留輪阻預朝鑿鳳飛遙聽於  
吉占鼇抃第馳於愚悃

代賀皇帝登位表

臣某言伏以虔遵末命光紹丕基天地同符人祇共悅

中賀臣聞重華之協於帝所以陟元后之尊下武之繼  
於文所以昭先人之業恭惟皇帝陛下聖躋維日德音  
乎天性于欽文躬有歷數四方所照適仰燭於離明萬  
國以寧遽獨觀於乾造荷五聖之謨烈副三靈之眷懷  
臣蚤與禁聯久違朝宁恭聽龍飛之會阻陪鼇抃之行  
代賀太皇太后受冊表

載享尊名益光令典欽聞大慶香悅羣情中賀恭惟太  
皇太后殿下至德靜專柔儀閑淑粵嬪仁廟以位中宮

訖無私謁之心陰有相成之道全節鉅美揜前世之徽  
音順子慈孫續兩朝之孝養惟是聖功之起卓犖哉顯  
冊之形容臣逃聽禮成不知手扞方居留於北道阻馳  
慶於明廷

代賀皇帝為太皇太后皇太后受冊表

輔臣虔使奉寶刻於二宮聖主尊親廣孝心於四海中  
賀恭惟皇帝陛下竇有重器勤懷永圖妙斷日新睿能  
天縱雖神幾聖烈蓋自得於生知而子道孫謀乃一歸

於慈訓爰舉極尊之號以酬莫大之恩臣適守宮符遽  
聞國慶阻就歡呼之列第深鼓舞之情

代賀皇帝為皇后受冊表

禮行吉日冊備長秋喜動六宮慶均萬寓中賀恭惟皇  
帝陛下紹休五聖齊德二儀不有至明亦資內助乃眷  
中闈之重尚稽顯冊之加爰命弼臣奉將盛典維邦家  
之所御先在儀刑猶日月之相須始全臨照臣比司留  
鑰正遠朝鑾莫從熬抃之聯徒仰母臨之慶

代元給事同天節進奉功德疏表

右臣伏以風薰貫序肇天令之清和日御盈旬戒聖期之震夙虹樞擁慶鳳歷標祥沸萬笏之歡聲橫九門之協氣臣是敢躬趨金地而禮玉毫命淨侶以薰修誦秘文而演暢所覲宸輝普照與塵界以無邊睿算增多等河沙而莫數第劇後天之祝曷勝向日之誠

代漕使謝上表

才難稱責既當煩使之劇權恩在國新復冒從臣之舊



籍寵緣任假感與懼并中謝竊以維今外臺莫重北道  
邊控強敵戍屯勁兵籠貨民間而惟恐涉傷財之名轉  
粟塞下而僅能供待哺之口而又歲支洪河之備而官  
用幾屈所以艱於運輸地列數鎮之師而吏員實煩所  
以要在刺舉苟虧精明強濟之具曷振轉給澄清之綱  
如臣空疎於事暗拙漫更委寄蔑著勞能比分帥符偶  
陷吏議官非理去既一跌於嚴塗咎止退思已都忘於  
榮路尚荷皇慈之寬置每蒙法語之矜存通漕朔方果

疏恩於不次進班延閣仍還職以如初載省生成率歸造化此蓋伏遇皇帝陛下乾綱獨運神斷日新進退朝論必清衷之自擇予奪官序絕浮議之可移遂俾單庸訖叨甄錄敢不內殫愚慮仰副睿懷少見事功庶酌燾覆

代漕使謝上表

小才之臨大計未知經畫之所從薄量之函厚恩尤懼寵榮之不稱中謝竊推諸路並建外臺特陝西領使之

難蓋軍須自昔之為重緣康定用兵之後顧民力至今  
而未完籠貨關中而唯恐涉傷財之名轉粟塞土而僅  
能供待哺之口加用度之百出無利源之一遺而頻年  
薦飢常賦罕入在平時之無事尚或須才方近日之餽  
邊宣容冒選宜得老於金穀之要術號曰朝廷之能臣  
俾總漕權始安物議如臣暗拙於事迂疏曾微日月之  
勤第幸風雲之會預巖塗之陟降迨此彌年董朔野之  
輸將止於踰月驟更劇部誠出誤恩此蓋伏遇皇帝陛下

下曲軫清衷弗遺舊物蓋念自塵於侍從未嘗少見於  
事功使効微勞免慙空食敢不內殫愚慮上體睿懷雖  
云轉給之司務充常課不為聚斂之計取累至仁

代韓魏公謝賜生日禮物表

報極終身感遂親生之日禮頒多物恩深君賜之時中  
謝伏念臣蚤竭孤忠久更大任效微毫髮之可數力覺  
筋骸之已疲竊愧妨賢屢求去位萬錢空食進無補於  
聖明六蠹啓行出猶叨於將相兆涼厥月載育初辰垂

記淵衷猥加異數衣均內帛駟出天閑飭有繡鞵玩兼  
鏤器遣子舍以將命耀公庭而拜嘉生也降神為翰實  
慙於山甫力非稽古所蒙何望於桓榮此蓋伏遇皇帝  
陛下德厚生成愛倂顧復俾孤臣之誕日榮寵錫於聖  
時敢不痛勉事功益循涯分既謹且乘之戒仍逃不稱  
之議誓罄丹衷仰酬洪造

代魏公謝傳宣撫問表

恭被德音遠聞睿訓以帥權尤劇防閑俾慎於忽微而

聖慮過深愛惜實同於顧復中謝臣本無遠業止任孤  
忠相二宗之日雖多事陛下之時猶淺第云智力之逾  
竭未有謀猷之可嘉尚賴風雲協期日月垂照灼知懃  
楛可備使令斷自上心付之西畧迄去離於左右蒙記  
憶於姓名恐識不明未朕之前而事或暗可虞之際導  
至言之委曲遣中使以丁寧難勝之恩有如九鼎之重  
欲報之命不啻一毛之輕昔告齊宣嘗聞孟子謂君之  
視臣如手足則臣之視君如腹心今陛下念區區之蹤

其撫存既若此之厚在臣某荷巍巍之德其愛戴宜如何之深誓委微躬仰酬洪造

代魏公謝賜藥物表

老臣告疾累奏於囊封聖主推仁特頒於藥物恩踰望表感極情涯中謝伏念臣幸適逢時才非經世昔懸辭於冢仕旋總制於西師夙夜忘疲庶寸勞之報國寒暄乖攝俄舊疾之嬰身瀝愚悃於上聞動睿慈之垂卹命使者之駕傳宣惻隱之言按神農之經仍賚竭疴之品

自慚弱質有軫清衷此蓋伏遇皇帝陛下禮厚近司愛  
偏舊物欲勉驅於哀恭因曲賜於矜憐良劑載和庶仰  
資於銜養洪私所被敢少怠於報償

代魏公謝生日禮物表

門弧之志四方適記親生之始邦詔之書十札遽蒙君  
賜之臨矧惟被惠之優榮敢不拜嘉而竦激中謝伏念  
臣此塵冢任自信樸忠才近不足以邈遠猷智小不足  
以諳大體未竭股肱之效已嗟筋力之疲妨賢懇避於



宰塗本覲鄉邦之養疾易守忍兼於帥路復叨闕輔之  
宣風西略是經寸勞何有適丁誕日第謹私門敢謂睿  
明亦煩省錄飭身枝而將命獲手舞以敬休良駟繡鞵  
既輟天閑之數織文鏤器復分御府之餘光生陋軀榮  
動衆目考愚衷而自省知恩紀之由來此蓋伏遇皇帝  
陛下禹度并容堯仁廣被乃眷四隣之舊不遺千里之  
遙爰舉舊章併推蕃錫孰為進退一酬今日之所蒙必  
也功名庶保爾生之無忝

代謝生餼表

抱恨已孤記親生之有日載廢既渥感君賜之維時拜  
命云初銜恩莫罄需雲寵被震厲交深中謝伏念臣風  
力不强時才甚陋萬鍾厚祿十年已負於空餐六印重  
權半歲頗慙於假器身逐戎旃之遠心存王室之間厥  
生之初在秋云孟遽荷惟恩之浹仍蒙飲賜之臨此蓋  
伏遇皇帝陛下優渥老臣始終舊物記其誕日嘉乃丁  
時均麩粲之精甘輟醪牽之肥旨既醉既飽愈防鼎食

之浮有猷有為畢望豐功之立庶殫塵露少答雲天

代謝賜詔允相州表

引疾拜章不覺懇言之累發賜書遣使忽蒙聖諭之矜  
從恩重何勝感深以泣中謝伏念臣久塵大任一信孤  
忠禦邊未究於薄能卧閣旋嬰於宿疹徒然自勉曾未  
有瘳勢不遑安顧總帥非養疴之地情無所隱冀上心  
推從欲之私果軫淵衷特頒溫詔備詒禮遇之非薄更  
赦赤愚之可誅俾息殘軀許還舊守書奏而臨淵每懼

思俞而勿藥自康豈曰衰罷可當眷寵此蓋伏遇皇帝  
陛下仁如天冒德與日躋虛懷最後於四隣愛不移於  
內外拂性恐傷於一物念愈篤於始終容解劇煩庶期  
完復優游此曰儻存犬馬之餘生黽勉異時誓答乾坤  
之大施

代謝中使齋詔令赴闕朝見表

故鄉得請合從便道之行溫詔垂音特許明廷之覲仍  
飭王人而將命愈知君父之隆恩俯伏拜嘉兢榮萃感

中謝伏念臣自明愚分獨恃主知懷章本望於息肩改  
帥弗容於量力私心尚歎未遑觀戎卒之旋歸宿疹俄  
嬰安敢效古人之卧治雖獲鄉邦之願豈忘魏闕之思  
名節適臨禮數尤異此蓋伏遇皇帝陛下不遺舊物垂  
記孤臣親遣星軺俾傳天旨仰荷乾坤之愛曷勝犬馬  
之情

代魏公謝傳宣撫問并賜湯藥表

星軺將命忽傳金玉之音天旨均慈仍拜刀圭之賜兢

榮維谷荷戴如山中謝伏念臣久玷冢司備蒙睿獎知  
樸忠之可使付寵寄而不疑一遠威顏再經旬決悉心  
圖報弗知道路之勤回首瞻恩唯有闕廷之戀方休徒  
御初見吏民遽被溫言兼班珍劑此蓋伏遇皇帝陛下  
俯憐舊物有軫深仁念病質之久哀冒時寒而遐適特  
賚養疴之具仰銜惻隱之恩誓竭愚能少酬聖眷

代謝賜詔及湯藥表

議將易地先開諭於溫書念此養疴復分頒於靈藥禮

誠出於特異力敢忘於自量中謝伏念臣幸適逢辰才  
非經世少則被用不謂精神之有涯老猶謹身至於衰  
恭而後已向往經於疆場比入覲於闕廷天光照見於  
殘骸鄉曲許還於素志優游偃息纔安僻郡之十旬委  
曲丁寧欲付朔陲之數路屬此大寒之際軫其多病之  
餘新領輕輅兼頒珍劑此蓋伏遇皇帝陛下眠孤臣之  
厚無舊物之遺拜嘉雖荷於深恩揣已難勝於大任臣  
已別具劄子奏論謹奉表稱謝以聞

代謝加功臣食邑表

三年親郊一日慶澤乃眷近司之舊適加美號之榮賦  
兼益於爰田懼實深於維谷懇辭弗獲虛受為慙中謝  
伏念臣力學不强賦能俱短二府迭居於一紀三朝奚  
補於萬分要路妨賢故鄉乞守自季秋之去國僅三月  
之偃藩伏值朝家若考前經聲裡上帝九州畢獻其力  
四海各勤其來而臣適領左符第聞盛禮固不能聽屬  
車之雷動扈從諸塗觀吉土之天臨肅雍在位遠成熙




事首沐湛恩併推異數之優增負罔功之愧此蓋伏遇  
皇帝陛下祇飭聖饗永承天心雖於穆猗那已形容於  
美頌而克自抑畏弗專享於蕃禧均霑洪私俯延外牧  
敢不勤宣條教益勵忠規免貽空食之羞兼塞假名之  
議

代魏公謝遣使齎詔撫問及授大名判府兼河北  
安撫使表

使指親臨詔音開諭清漳病骨蒙典軫於餘生全魏高

牙俾勉從於重任成命固知於難免私心間有於未安  
中謝伏念臣幸適逢時才非經世早以功名而自許不  
知量力而後行晚惟衰暮之相乘未即乞身於勇退丐  
故鄉而偃息冀滿歲以優游會朔野之游蓄動上方之  
北顧乃分綏御之柄以屬短疎之材而又丁寧以遵卹  
民之言周旋以盡使臣之禮此蓋伏遇皇帝陛下寬仁  
兼愛終始誤知因付畀於劇權首簡圖於舊物儻止以  
別都而假守猶堪強策於疲駑如兼數路之提封實恐

生成於瘵曠所有兼河北安撫使臣已別具劄子論奏  
謹奉表稱謝以聞



祠部集卷十五

欽定四庫全書

集部

祠部集卷十六至

詳校官庶吉士臣朱理

檢討臣何思鈞覆勘

總校官編修 臣朱 鈐

校對官編修 臣馮敏昌

謄錄監生 臣方祖益

欽定四庫全書

祠部集卷十六

宋 強至 撰

表

代魏公北京謝上表

獨當一道尚容抽竭於微才兼撫連城實恐難勝於重任  
肇班寬詔深愧厚恩中謝伏念臣風力不强器能實  
謙致身奚識於枉道接物惟存於至誠朝廷非繫于重  
輕將相輒更於出入且所臨皆劇精神已耗于當年而

其得過多疾病遂乘於今日方戢倦飛之翼少安舊集  
之林甫爾涉春遽然易地大稱全魏之部北控強敵之  
疆比雖水旱之稍平茲尚民流之未復冀蘇疲俗爰屬  
老臣顧無惠術以安人慮之威聲之服敵始懇辭而弗  
獲訖冒處以為慚此蓋伏遇皇帝陛下政在圖新任先  
求舊特自清衷之所簡不惟綿力之不堪敢不蒐講武  
經道宣利澤殘軀龜勉倘偶立於事功睿旨丁寧庶弗  
孤於器使

代謝遣使齎詔賜藥表

詔旨趣行方就所封之國聖心垂軫俯憐多病之軀爰  
飭貴璫特頒珍劑捧受惟知於恩重報償愈覺於命輕  
中謝伏念臣自効孤忠累更大任俱殫智力勇為不復  
於當年兼撫兵民劇用尚蒙於今日靡容辭病豈敢圖  
安勉去故鄉亟來會府卹民寬詔奉行未及於彌旬將  
命輕輶傳問已臨於所部賜細書之溫厚加靈藥之光  
輝此蓋伏遇皇帝陛下愛篤老臣念深舊物以驅馳之



即舍俾服餌以扶衰仰戴睿慈曷勝愚抱

代魏公謝都知傳宣撫問並賜龍茶表

北門居守未宣駑力之寸勞南土貢珍遽錫龍盤之上  
品仍屈王人之長親傳天語之慈恩重難勝感深以惕  
中謝伏念臣初無遠業訖至近司間緣疹疾之乘方避  
寵榮之極勉來全魏且蕪撫於兵民幸通故鄉猶少安  
于習俗一叨師領屢拜君言存問既勤匪頌尤渥矧靈  
芽之異產豈俗肺之易嘗此蓋伏遇皇帝陛下克念老

臣弗遺舊物垂睿音而下及加寵賚以俱霑載省衰疲  
奚從報塞

代魏公謝賜生日禮物表

親生在旦方萃感於已孤君賜維時遽拜嘉而至渥寵  
榮所集震厲無從中謝伏念臣底滯天資迂疏時用特  
緣一介之術業游歷三朝之弼謨螿竭短才猶坐兼於  
衮鉞徘徊重祿未歸就於田廬左弧第謹於私庭中詔  
忽傳於子舍衣頒內府馬錫天閑韜葉有輝器文加鏤

生而維翰實慙山甫之降神今也所蒙又異桓榮之稽古此蓋伏遇皇帝陛下愛深舊物禮厚孤臣垂記始生猥加異數敢不益殫驚怯少荅龍光庶逃不稱之譏仍謹且秉之戒上恩既重臣命逾輕

代謝歷日表

日月所纏天地之紀會成密課例被誕班中謝恭惟皇帝陛下握斗宅尊撫辰凝命靈承乾緯首飭人時黼坐儲精長茂在躬之數清臺攷法順稽合體之元臣適守

留符與觀明訓豈敢失墜唯謹奉行

代賀正表

伏以東國著經謹春秋之五始西京講物覽圖籍於三  
朝於皇盛時九重令節中賀恭惟皇帝陛下欽修人紀  
茂憲天心七政之察璿璣四氣之和玉燭方對時而育  
物屬獻歲之發春星拱臣鄰稱慶歲元之會日章聖德  
同符歷紀之新臣適守別都正遙丹旆阻預壽杯之獻  
不勝魏闕之情

賀同天節表

粵若首夏肇惟泱甸是生聖人克享天命傳祖宗相受  
之業六五帝以御圖竭臣子仰祈之心億萬年而慶壽  
中賀恭惟皇帝陛下聖濟維日德肖乎天發威斷之神  
明藏政幾於鼓舞虹沅電繞臨載誕之初辰日永風薰  
亘無窮之協氣臣欣逢慶節阻望清光適靡北土之居  
留徒罄南山之頌祝

代謝詔書撫問表

念臣衰之多病適履歎炎煩主聖之推慈有加軫卹詔  
音開諭使指親臨中謝伏念臣蚤備近司初無遠業猶  
兼將相之過寵盡出聖神之誤知忠與生俱罄厥股肱  
之效疾隨老至僅乎皮骨之存溽暑貫時淵衷閱舊因  
曲頒於睿旨俾自補於殘軀此蓋伏遇皇帝陛下盛德  
海涵至仁天覆治恐傷於一物欲盡安全愛尤篤於四  
鄰弗殊內外特垂清問爰及孤臣

代謝詔書賜湯藥撫問表

舊疴荏苒乃貽君父之深憂溫詔丁寧更屬王人之曲  
諭言頌靈劑俾輔殘軀中謝伏念臣學昧聖賢名兼將  
相祿既浮而量溢福不勝以災生忠激一心雖曰股肱  
之自力疾攻四體僅乎皮骨之獨存敢圖皇慈特遣使  
指形十行細札之訓分五色一丸之輝豈云衰遲可稱  
矜卹此蓋伏遇皇帝陛下愛偏舊物義篤老臣為憐犬  
馬之嘗勞不輕螻蟻之至細始終乃眷遠近弗移儻積  
疹有疹喜敢言於勿藥顧大恩欲報命何啻於如毛

代魏公謝進仁宗實錄賜詔獎諭表

大典告成實虞漏畧細書垂諭猥被褒嘉伏讀載周兢  
榮失措中謝恭以仁宗皇帝稽古文思憲天聰明高拱  
博臨享國既久至仁廣澤入人者深威惠之漸外夷命  
令之孚羣聽忠賢哲輔之參用墜禮濶儀之並修可著  
無窮悉歸所載編研之手固曰難才典領之司尤非易  
處而臣叨榮有日逮事當時久居畿政之間親奉德音  
之數雖見聞之靡惑終才識之非長妄董諸儒獲成信



史比塵聖覽方悖愚衷伏遇皇帝陛下祇服孫謀適追  
祖烈以天地之德難紀赦其撫實之非工以歲月之積  
頗多因以念勞而加獎欽承寵賜唯謹榮藏

代謝生日禮物表

親生在旦方追顧復之恩君賜維時遽被寵榮之數拜  
嘉既滢萃感兼深中謝伏念臣自任孤忠遂階顯服萬  
錢之享十年已負於空餐六印之歸一道尚尸於重寄  
適臨誕日垂記淵衷賜出帝庭命銜子舍織文鏤器以

光其玩繡韜良駟以養其安部室增輝羸軀動色維周  
之翰固慙山甫之生稽古所蒙何有桓榮之力此蓋伏  
遇皇帝陛下至仁天昌大度海涵曾舊物之弗遺省初  
辰於載育適頒多物併及孤臣敢不脩建事功蓋循涯  
分既謹且乘之戒仍逃不稱之譏庶荅洪私曷勝丹抱  
代魏公謝歷日表

清臺密課綠檢細書既叨拜貺之榮又被勸民之訓中  
謝竊以布治正月雖萬俗之具觀頒朔諸侯欲四方之

皆曉恭惟皇帝陛下乾綱總攬王事適新戶牖儲精自  
坐知於天道璣衡則象復敬授於人時臣適忝居留與  
聞辰告當仰虔於詔意使畢懋於歲功

又

臣某言伏以西京講物萃圖籍於三朝東國尊王書春  
秋之五始臣誠歡誠抃頓首稽首恭惟皇帝陛下至仁  
天冒盛德日躋宴然享函夏之歸坐以須大明之旦蒸  
民觀象會歲歷之更端上帝降康宜春祺之備舍臣懷

章北道方階偃息之求稱壽南山阻與歡呼之列

賀同天節表

臣某言伏以日御盈旬風薰報夏高厚協贊聖神挺生  
慶節誕臨歡聲四起中謝伏惟皇帝陛下續烈淳耀宅  
心太清濬堯思之欽明懋禹躬之勤儉清和首月震夙  
丁時六五帝以御圖傳祖宗相授之業億萬年而享祚  
對天地無疆之休臣適守宮符阻陪廷著第整岡陵之  
祝一均海寓之情

代劉希道待制謝上表

獨當一道兼拊六城初見吏民敢言師帥第奉行夫寬  
詔奚取稱于明恩中謝伏念臣比自孤生驟叨近侍進  
不由於累日幸實出於遭時言責所司那避貴權之側  
目計文云總初知功利之究心僅此再暮訖無寸效會  
坤維之缺守荷乾造之曲成簡自淵衷畀之重寄食君  
之祿義難取於便安以親為辭情蓋緣於危迫露章既  
上悖魄弗寧不能叱馭以為忠方爾闔門而待罪適逢

廣愛特緩嚴誅眷朔野之奧區號常山之劇鎮弗離舊  
部就付要麾侍慈母板輿之來近踰十舍觀居民雲屋  
之盛雄胝四封竊寵尤多載恩有所此蓋伏遇皇帝陛  
下至仁天冒大度海涵孝治之行不欲一夫之闕養睿  
慈所及尚容千里之班條敢不圖講政經刺求民瘼庶  
集涓埃之績少酬覆載之私

代謝賜生日禮物表

左跡之志四方日記親生之所始細書之行一札時蒙

君賜之云臨期服寵榮彌深震疊中謝伏念臣素無遠業特恃孤忠寅緣誤恩塵玷重任出入將相萬錢久負於空餐綏御兵民六印滂叨於兼綰適逢載毓之旦方軫已孤之懷奉將溫辭垂遺恩息衣出內府馬分上閑帶飾光軀器文溢目降神之美維翰既慙山甫之生稽古之誇所蒙又匪桓榮之力此蓋伏遇皇帝陛下不遺舊物曲示厚恩名器所司輒容於假寵服乘以拜唯有於論酬誓訖餘生少償洪造

代魯公謝男授龍圖閣直學士表

臣某言伏奉聖恩除臣男某龍圖閣直學士者愚息進  
秩就加舊閣之從聯老臣退居愈幸私門之榮觀仰承  
乾造俯劇震驚中謝伏念臣歷事三朝蚤更二府遽至  
禮經之七十未償恩紀之萬分印綬寵名悉上王朝之  
義圖書寶構誤延子舍之微何意顏齡與逢顯渥此蓋  
伏遇皇帝陛下至仁天覆盛德海涵博延衆材畢取介  
善不遺輔國之舊遂及趨庭之私敢不教忠俾盡馳篤



之薄效庶其論報弗辜舐犢之微情

代魏公賀明堂大禮畢表

臣某等言九月日明堂大禮畢者伏以聖人唯能於饗  
帝並侑五精之神嚴父莫大於配天兼風億姓之孝合  
宮已事罄宇蒙休臣某等誠歡誠忭頓首稽首伏惟皇  
帝陛下詔浮耀之烈光享重熙之盛福九穀登富二儀  
降康益謹靈心之承勿專聖德之有遂沿報本之故事  
參講思文之曩篇既歎殊庭載假清廟爰及宗祀維時

總章百靈居歆六樂備奏迺薦鬯之夕昭格神光之靈  
瘞幣之時歛蒙天表之應思共蕃祉隨宣湛恩協氣交  
流一均雷雨之施歡心各得並浹人祇之和臣等適聽  
休成倍深竊忭方祇留務異興歎於周南莫克駿奔第  
馳誠於魏北臣某等無任慶幸忭蹈屏營之至謹差某  
官齎表詣闕賀以聞

代謝加功臣食邑實封表

熙事適成湛恩隨布載加寵號兼行真封賦仍進於爰

田懼實深於維谷中謝伏念臣素慙遠業自信孤忠朝廷非繫於重輕將相輒更於出入平生許國竭愚慮而不無連歲撫民論治功而何有伏值寧朝展宋陽館奉禋四海各來莫克陪祠於夙夜九州畢獻尚安助費於毫釐速推神貺之均首及宰司之舊蕃然異數萃此罔功飭詞臣而賜書遣族孫而將命禮踰常矩恩激危衷此蓋伏遇皇帝陛下靈承天儀風示民孝雖鴻名弗受自存聖德之全而不祉所蒙嘉與臣鄰之共敢不勤宣

睿訓勉懋壯猷庶逃空食之羞兼塞假名之議

賀同天節表

臣某言伏以火德兆時協契景炎之運虹光薦瑞挺生  
睿哲之姿慶節誕臨歡聲四起臣某誠歡誠忭頓首稽  
首伏惟皇帝陛下德符乾健治對離明性循仁義之行  
躬發神明之斷風薰報夏日御盈旬厥月清和維時震  
夙觀文太史喜逢箕翼之明稱壽羣工願等岡陵之固  
臣跡遙廷署守在官符第虔就望之誠阻與歡呼之列

代百官謝御筵并傳宣表

順理大川實由王道之正推慈廣燕益盡臣心之忠馳  
遣使人宣傳法語涵濡睿渥鼓舞興情中謝恭惟皇帝  
陛下總擘萬機畢張百度眷言二埽之決尤動數城之  
憂塞故開新雖交陳於羣策取長舍短緊獨斷於淵衷  
亟興厥工陰有所相如期底績飛奏告成蓋建中克應  
於天心故潤下不違於水性爰即會府以頒慶筵廣坐  
多歡同聽鹿鳴之什寧朝信史復紀河平之年

代魏公納節表

躬荷兵民之重任既非有疾之能勝生蒙將相之兼榮  
抑豈無功之可據比懇還於印節庶僻守於麾符蓋高  
未動於物情宣諭遽煩於使指洵敷危悃決俟俞音中  
謝伏念臣四紀逢亨三朝竊寵良自寡能而厚祿遂罹  
多病以久衰一辭東府之鈞衡再領北門之筦鑰莫非  
強勉以濟劇繁心雖云勞力有不逮以至河壑舊防而  
失備民逃常產而未歸職由冒居皆合引去然猶徘徊

歲月偃息朝昏庶幾小康翻覺筋骸之漸憊若曰微效  
訖無毫髮之足甄於茲不能可以遂止苟尚貪於要地  
將不保於餘生唯有至仁能全微欲伏望皇帝陛下俯  
憐舊物特軫孤臣許上戎旃并收貂冕小邦簡靜俾專  
近於方書悴質支離免即填於溝壑瀝膽願回於天聽  
沒身期報於君恩

第二表

由東叩露納節矧緣於疾辭冀上哀憐改麾兼賜於可

報物情必至天意未回苟避雷霆之誅恐先溝壑之委  
敢殫危懇決俟俞音中謝伏念臣生賦樸忠早塵顯服  
不惟智力之可否但務私恩之報償甫及中年遂罹多  
病自叨再任之後已是久衰之餘雖復親近簿書繕完  
城府蓋一日效昔人之必葺固非樂為且三載之往典  
之陟明自宜引去况兵民非卧疴而可治將相豈尸祿  
而得居更勉強以貪榮將顛隳而速禍弗全殘喘有累  
至仁伏望皇帝陛下日月照臨乾坤覆載任別圖於衆



哲志曲就於匹夫許上戎旃免司留鑰息肩閒郡俾士  
意之稍完沒齒盛朝庶皇慈之可答

第三表

罔功納節以疾請麾再嘗自陳一切未許行恐餘生之  
不保敢千萬死以有聞中謝伏念臣中實枵然生而驚  
甚寵榮欲報勇於遇事而輒為筋力既衰失在知難而  
未止比救將顛之質疊傾必至之誠厚祿戒貪願上淮  
南之旄鉞小藩乞守免當河朔之喉襟尚遲矜從尤激

危懼蓋殘軀不息漸歸溝壑之為鄰空食寢深轉愧涓  
埃之無補伏望皇帝陛下特回天聽俯徇物宜不遺螻  
蟻之微情各任鷦鷯之常分有民人足以為政畀吏郡  
足以養疴許將相之辭隆絕公朝之假寵既完素守仍  
息久勞恩施難名報償何有

第四表

病難任劇職合辭隆開可不時顛隕無日危迫敢殫於  
血懇哀憐願軫於皇情中謝伏念臣起自孤生初無遠

業祿常過量寵榮最早於他人福不勝灾疾疹遂纏於今日所以懇還將相之印力避兵民之權庶就開州少舒瘁質私計已决愚誠不移雖委寄誤深不謂三年之已久而衰疲待報翻嗟一日之為長矧是戎旃固非虛器無功以領於義未安使老臣兩失於寸心豈人主相優之本意伏望皇帝陛下特回天鑒曲盡物宜就更摩符許上旄節馳驅駕足免令濱死於未休偃息殘骸或冀餘生之可保大恩難狀丹抱奚論

第五表

重負未釋日寢久而力窮疾呼欲聞天轉高而聽緩敢  
罄論於懇迫願畢賜於矜從中謝伏念臣自信直誠所  
羞枉道寵利雖豐而宜取未始輒辭事為至劇而可當  
曾何少避唯是我旃兼一品之要留鑰守三年之餘得  
既過多處亦云久且無功而享厚祿雖貪夫有所不為  
多病而荷重權在老者尤難自強所以納節以逃空食  
之恥乞守以息殘軀之勞凡經危惴之五陳未賜德音

之一可苟遂循於緘默是坐待以顛濟伏望皇帝陛下  
曲貸餘生洞明孤抱知辭隆非出於飾偽念避劇實緣  
於負疴就改麾符并收旄鉞親近醫藥免令溝壑之即  
填養安形骸悉自乾坤之再造謀心已決得請後休

代謝再任表

悃悞累陳從欲許還於新節衰疲自力竭能勉撫於舊  
封委寄逾陳顛濟是懼中謝伏念臣本緣一介之曲學  
歷被三朝之誤知自解宰鈞繼紆守綬早年遇事風霜

不計於殘軀晚歲纏疴藥餌乃同於常膳比引揣躬之  
分數裁辭劇之章力丐閒州少安病質而思生望外事  
與願違俄更西雍之帥旄仍赴北門之留鑰所以極陳  
去就仰竇聰明幸寵利非事君之宜必冀寢加恩之命  
策疲鴛雖老臣可強敢不拜再任之休訖奉諭音兩諧  
愚懇此蓋伏遇皇帝陛下至仁天冒盛德海涵器使庶  
工愛偏舊物雖俊傑甚衆並試有為之時而疴瘁之餘  
惜技無用之地敢不勤宣條教兼拊兵民儻溝壑之未

填尚乾坤之可報

代張景元龍圖知成都府謝上表

優加職任特私名器之大公初見吏民即諭朝廷之廣  
德才微責重寵至懼深中謝竊惟益郡之奧區茲實坤  
維之劇鎮有江山之控帶兼民卒之撫綏從來守臣多  
采宿望如臣甚陋自視無堪侍從最為晚躋技能奚滴  
時用更計籌于內外之政績于毫分及此踰年遽云增  
秩顧巨藩之所委非小器之可當而又煩使向臨于兩

川先臣嘗列于近職領蜀門之印綬曾是昔游直廷閣  
之圖書復叨世選何乃微躬之幸獲茲數事之兼此蓋  
伏遇皇帝陛下躬攬乾綱日新睿斷眷先朝之舊物記  
通漕之孤臣躡等班行之間推恩屏翰之寄敢不博求  
民隱祇訓戎韜坐布寬條底輿情于安集力圖靖治副  
聖訓之丁寧

代人謝知成都府表

初見吏民即宣條教重任而力不逮寵過而心若驚中



謝伏念臣江海微生朝廷孤士當龍德離潛之始方參  
貳于大農洎天心求治之間復總司于外計未嘗伸愚  
瞽之慮得以補聖神之聰忽蒙誤恩起置華選矧頃馳  
於單傳嘗歷使于兩川今茲守封實乃故地叱忠臣之  
馭雖媿於古人剖刺史之符獲綏于舊俗倍為榮幸尤  
荷生成此蓋伏遇皇帝陛下躬攬權綱首敷勸嚮不責  
已試之驗而觀其後效特屈非常之命而激其壯圖遂  
俾短能亦叨劇委而且徑從便道祇領嚴程阻瞻前旒

弗克稟睿謨而後往務靖遠服庶幾虔詔旨以恭行

代謝進和御詩獎諭表

案此表以下俱據宋文鑑增入

參羣篇而奏御賡載非工被優詔之發中褒嘉甚渥惕然拜君父之賜藏以為子孫之榮伏惟書曰帝庸作歌所以極道明良之意雅云臣能歸美所以上酬福祿之辭惟千載一時之逢踰三五二帝之際乘太平之多暇講稀濶之盛游歷寶宇以披祖宗相受之文御飛帚以縱神聖有餘之學以至置酒別殿賦詩中宸于時從聯

咸續睿唱如臣者有朴愚而植性無文采以表身自陪  
風憲之要司都廢微言之舊學妄挾鄙思綴成斐章大  
樂在前發哇聲而接響太陽臨下銜爝火以交光既噴  
邃旒若臨深谷敢謂兼容之度例形過獎之辭游聖門  
者謂之難言矧繼堯文之後踰華袞者重夫褒字况蒙  
漢訓之加夫何孤臣叨此厚幸此蓋伏遇尊號皇帝陛  
下齊德乾覆育材士倫善雖小而弗遺力或矜其不逮  
並言竭講廟之效庶酬勉勗之仁

代都運趙待制謝上表

小材而臨大計不知經畫之所從薄量以函厚恩唯有  
思勤而可補竊以今之北道重曰外堂邊宿勁兵境控  
疆敵歲支洪河之備而民力幾屈所以艱於賦輸地列  
數鎮之師而吏負益繁所以要在刺舉宜擇精明疆濟  
之器以付轉給澄清之權若臣空孱於事迂拙鄙引兩  
川之漕近貳大農之司率涸竭於愚衷訖罕通於利術  
敢期煩使乃委孤臣此蓋伏遇皇帝陛下廓天地之容

收涓埃之細特加不次之命而欲勸來者弗責已試之  
効而俾懷後圖得不夙夜以思始終乃職豈敢專聚斂  
之最以上累於君仁亦當拊凋殘之餘庶下蘇於民瘼

祠部集卷十六